

DISPUTATIO INAUGURALIS MEDICA

De

GANGRÆNA

ET

SPHACELO.

Quam

DUCE ET AUSPICE

Summo Naturæ Gubernatore

AUTHORITATE ET CONSENSU

*Gratiosissimi ac Excellentissimi Medicorum
Basileens. Ordinis,*

In

Alma hac & Florentissima Rauracorum

V N I V E R S I T A T E,

Pro

SUMMIS IN ARTE MEDICA

Honoribus & Privilegiis Doctoralibus

ritè consequendis,

Publicè ventilandam proponit

ANASTASIUS HERTZOG

Kirchemâ Tecc. Würtemberg.

Ad diem 18. Julii An. MDCXC.

Loco horisque solitis.

BASILEÆ,

TYPIS JACOBI BERTSCHII.

V I R I S

*Nobilissimis, Excellentissimis, Amplissimis,
& Experientissimis,*

DN. SALOMONI REISELIO,

DN. GEORGIO GMELINO,

DN. JOHAN. CASPARO HÆRLINO,

Serenissimi Würtembergiæ Ducis Consiliariis
& Archiatri Celeberrimis,

Mecœnatibus ac Promotoribus submisso
cultu & sincero pietatis affectu æternum
devenerandis.



E miremini, Viri Celeberrimi, Dissertationem hanc
Inauguralem Vestris dedicatam Nominibus, in lu-
cem prodire; quando enim vestrorum in Rempubli-
cam Litterariam, hinc & bonos quoscunq; merito-
rum fama non ad meas saltem pervenit aures, sed
litteratum jam Orbem gloriôsè pervagatur, mea simul tenuitas
omni indigens patrocinio requirere videbatur, ut, postquam
Divini Numinis Auxilio, Studii Medici, cujus amore ab incunabu-
lis ducebatur animus, cursum absolvi, indeq; ad Examina Do-
ctoralia à Celeberrimo Medicorum Basileensium Ordine, gratio-
sè admissus fui, obsequiosi animi testandi ergò, Theses has qua-
lescunque Excellentiss Vestris, debito cum observantia & hono-
ris cultu consecrarem; quas proin, ut serenâ fronte excipere,
simulac studiis conatibusq; meis laudatissimo benè cupiendi af-
fectu gratiosè favere dignemini, humillimè obsecro; Deum Ter
Opt. Max. pro Excellentiarum Vestrarum incolumitate perenni,
& omnigenâ prosperitate devotâ mente precatus. Valete.

Scripsi in Athenæo Basileensi, D. 26. Julii 1690.

EXCELLENTIARVM VESTRARVM

Observantissimus Cultor & Cliens

ANASTASIVS HERTZOG,



Σὺν τῷ Θεῷ.

P R Æ F A T I O.



Um plurimæ, fereq; innumerabiles sint calamitates, quibus humani corporis sanitas offenditur, veruntamen nullus vitæ, & incolumitati humana infensor reperitur Tyrannus, quàm Gangrana, hancq; frequenter subsequens Sphacelus. Hic enim tantâ atrocitate, atq; sævitia in humanum corpus sævit, ut nulla propè pars sit, quæ ipsius Tyrannidi & sævitie se subtrahere, aut ab ejus invasione secura esse possit; imò subinde nobis viventibus, integræ partes corporis nostri, immanes inter cruciatus & æstum igneum, tandem omni sensu motuq; destituta, moriuntur atque computrescunt, ita ut crudeli statim manu Chirurghi, eas rescindende sint, ne sincera partes simul inficiantur. Nec enim malum hoc ad instar aliorum morborum perfunctoriè infestat, aut ad salutem quancūq; partis affecta terminatur, sed ubi semel nidum suum composuit, pertinacissimè inhaeret, & haud duntaxat partem illam, quam aggreditur, corrumpit ac mortificat, sed sæpius cito pede progreditur, & nisi citissimè occurratur, totam Microcosmi machinam destruit, agrumq; sine ulla salutis spe, è medio tollit. Nobis in præsentiarum lubuit Gangranam & Sphacelum, pro ingenii & experientia modulo, examinare publiceq; exponere. Benè cæpta Deus Triunus secundet!

T H E S. I.

GAngrana, vox est Græcæ originis, juxta nonnullos derivata à γεῖν, comedere, quia maximè devorat, instar cancri vel Lupi. Dicitur & aliis Ignis S. Marcelli & Antonii, Ignis Persicus, Esthiomenos. Germanis vocatur der heisse Brand / meliori jure potest dici die anfangende Ersterbung, quoniam principium est τῆς νεκρόσεως.

II. Hinc enim definitur incipiens mortificatio partium mollium

mollium, & ossæarum, cum livore, dolore ardente, & maxime pungente, orta, à sanguine acriore & corrosivo viscido, aliisque causis fluxum & refluxum humorum impredientibus.

III. *Sphacelus*, à Græco nomine Σφάκελος, ἀπὸ τῆς σφάζειν, à jugulando, enecando dicitur, quia affectus hic partes corporis humani viventes, modò semel in illis radices egerit, enecat. Ab aliis dicitur Σφακελισμός, item *Eschiomenos*, *Necrosis*. Latinis autem *Sideratio*, id est, *Sideris Percussio*, *Mortificatio*, *Corruptio*, *Putrefactio*, plerumque tamen retentò Græcorum nomine, appellatur *Sphacelus*. Germanis nostris audit & improprie **der falte Brand** / meliori verò jure vocari potest **die vollkommene Ersterbung** / sive perfecta νέκρωσις.

IV. Est enim *Sphacelus*, totalis partium, non mollium tantum, sed & durarum, mortificatio, cum foetore insigni, nigrore, & sensus tactus integrâ ablatione, orta à sanguinis atque Spirituum animalium influxu prorsus ablato.

V. Ex hisce Definitionibus jam abundè patet, partes tunc Gangrænâ affici, cum ipsarum tubuli ita sint obstructi, ut paucissimus sit sanguinis, & succorum per illos influxus, ac transfluxus. Dicimus paucissimum in Gangræna esse influxum, ad differentiam scilicet indicandam, quæ inter Illam, & Sphacelum intercedit, in quo nullus planè adest sanguinis, reliquorumque succorum influxus, sed tubuli omnes disrupti, corrosi, fracti & dilacerati; imò sanguis, reliquique succi adeò corrupti existunt, ut nullus motus intestinus, nullavé fermentatio naturalis amplius inter ipsas fieri possit, quin sæpè induant naturam Mercurii sublim. corrosivi, omnia erodentis; unde vitali succo, ceu calido & humido naturali non amplius influente, vita partium dissolvitur, omnia redduntur cadaverosa, & vitæ expertia. Ex quibus simul patet, differentiam illam, inter utrumque horum affectuum occurrentem, nonnisi gradualem esse, dum circulatio humorum in Gangræna impediatur, tubulis quibusdam adhuc existentibus apertis; in Sphacelo autem prorsus tollatur, ob tubulos penitus corrosos, aut aliâ ratione laceratos.

VI. *Subjectum* Gangrænæ ac Sphaceli, uti in Definitionibus

bus expressimus, sunt partes tam molles, quàm ossæ: imò partes corporis humani omnes, & internas & externas Gangrænâ ac Sphacelo affici posse, præter experientiam quotidianam, compluribus & innumeris Medicorum Practicorum observationibus patet; sic scrotum, brachium, faciem, digitos, pedem, tibiam, &c. sphacelata observavimus. Sic nec viscera ab eo malo insontia sunt, imprimis Intestina, quæ in Dysenteria, Ileo, Herniis, sæpius sphacelata reperiuntur. Sic nuperrimè Omentum, scroto incarceratum, sphacelatum notavimus. *Dodonæus* vidit puerum 6. annorum, cui sphacelus brachia, manus, pedes, nares & aures occupavit, ita ut, licet mutilatis Sphacelo infectis membris vitam conservare studuerint Chirurghi, miserè tamen perierit. Cerebrum quoque sphacelatur, post vulnera, aut in phrenitide. Nec Cor immune, sed sideratum & escharoticum, in homine Peste interempto, inventum, tradunt *Helmont.* & *Thom. Bartholin.* Porro etiam toto die observamus, partes illas, quæ paucis gaudent nervis, aut etiam à corde sunt remotiores, hoc est, quæ sufficientem accipere nequeunt sanguinis ac succorum influxum, dicto sæpius affici malo, unde quoque inferiores corporis humani partes, præ superioribus magis invadi Gangrænâ, conspiciamus, quia scilicet in illis circulatio sanguinis difficilius quàm in superioribus procedit, adeoque frequentior ad stagnationem ansa habetur, cum ob motum magis lentum succi circulantes, ibidem crassiores subinde evadant.

VII. *Proxima Gangrænæ Causa*, non est, nisi circulatio humorum impedita; hinc succi illi, dum motum suum per tubulos partium, habere nequeunt, ibidem hærendo, multas obstructions efficiunt: unde ob sanguinis venulas distendentis colorem, pars nunc rubicunda, nunc livida evadit; ob particulas autem, in succis stagnantibus, rapidiore motu agitatae, dolor, atque ardor ille acerbus, contingunt. *Causa sphaceli proxima*, est tubulorum in parte affecta dilaceratio, quæ ex Gangrænâ enascitur, in qua succi stagnantes, acquisitâ acrimoniâ corrosivâ, spiculis suis scindentibus, fibrillas quasquæque obvias solvunt, sicque efficiunt, ut solutâ tubulorum compage circulatio, nunquam restituatur, sed pars emortua, & nigra,

rescindenda, separanda sit, sensu omni, ob spirituum animalium perditum influxum, privata.

VIII. *Causæ Antecedentes* horum Affectuum, sunt particulæ, salino-acidæ, acres, quæ partim occasione intemperiei, si-ve nativæ, si-ve adventitiæ, partim occasione Diætæ vitiosæ, Massæ sanguineæ copiosius accesserunt, eamque ad stagnationes idoneam reddiderunt. Sic & morbi quidam, vel maligni nimis vel malè curati, Gangrænas, atque sphacelum, post se trahunt. Qui ex Peste, Febrisque aliis malignis, intereunt, ex Sphacelo partium internarum, inprimis glandulosarum, eneantur. Hinc *Clariss. Theod. Zvingerus, Physic. in Academ. Basil. Prof.* non ita pridem in exenteratione pueri cujusdam, Variolis extincti, observavit quamplurimas Hepatis, atque circa Lienem, ut & plerasque mesenterij glandulas tumentes, & prorsus fideratas. *Excellentiss. Doleus, Archiater Hassiacus*, Pastorem quendam, post Febrem Petechialem Sphacelo sinistræ tibiæ correptum, adnotavit, in *Encyclopad. suâ Chirurg. Amplið. Tulp.* autem *Observ. Med. Libr. 3. cap. 48.* in muliere quâdam, Febrim in Sphacelum immedicabilem sinistri brachii, solutam fuisse, memoriæ prodidit.

IX. *Causæ procatactica*, & externæ, variæ sunt: Inter illas se offert, primò Aër, qui docente *Hippocr.* ut mortalibus est causa vitæ, ita & morborum, ac sæpè mortis. Inprimis aër frigidissimus, multum ad hunc affectum excitandum, contribuere potest, in istis enim regionibus, ubi frigus semper prædominatur intensissimum, ut Islandia, Grönlandia, Norvvegia, &c. plures auribus, naribus, & digitis orbari, asseritur: Quando scilicet à particulis aëris gelidi valdè rigidis, fibrillæ partium nimis crispantur, sensimque ad Sphacelum ducuntur; quod citissimè contingit, quando rigida membra subitò excalescunt. Sic & alimenta frigida, crassa, acido-corrosiva, suum symbolum addere possunt: Evacuationibus, & Retentis Præternaturalibus, etiam quandoque culpa adscribenda, ut sunt Hæmorrhagiæ magnæ, Hæmorrhoidum, Lochiorum, Mensiumque fluxus immodicus; aut retentus; sanguis enim jam extra vasorum ostia exclusus, ac ita retentus, & congrumes-cens, ulcera, ac necrosin inducere aptus est, ut docent monu-

menta Medicorum. Ex urinæ suppressione Sphacelum procreatum, in suo filio observavit, *Clariss. Fabric. Hild.* Sic *Paraus, libr. II. cap. 3. Observ.* dicit, ex Anthrace, & Carbuncule Sphacelum provenisse. Affectus hic quoque excitatur à morfui animalium venenatorum, imò canum rabidorum, uti *Exempla* testantur. In Passione Iliaca, Fracturis quoque & Luxationibus, Ulceribus, Vulneribus; item nervorum læsionibus, & aliis plurimis morbis, huic affectui fores aperiri, quotidie observamus, præprimis si ab *imperitiis Barbitonforibus* tractantur: contingit etiam in Hydrope, quoniam partes, per longum temporis spatium ab aquæ abundantia, distentæ sunt, tandem & ruptæ, aut erosæ; è quibus serum copiosè effluens, nimisque collectum, tubulos quoscunque vicinos comprimit, suâ quoque acrimoniâ arrodit, usque dum denique circulationem succorum impediendo morbum hunc producat. *Borellus Observat. 3. cap. 3.* narrat, in Nobili quadam matronâ digitum fuisse amputatum, ob Sphacelum, ab aciculæ puncturâ, productum. Sic ante aliquot annos, præfatus *Clariss. Zvingerus*, Virginem 20. circiter annos natam, Familiæ Nobilissimæ vidit, cui manus dextra leviter inflammata, ac sub imperita & negligenti curâ *Insulsi illius Agyrtæ Hagenheimensis Marci Wacher* sphacelata, prorsus rescari debuit, ut mutilata sic lectissima Virgo, quotidie *Nebulonis* illius crudelem ignorantiam detestetur. Ex fortiori constrictione fasciarum, in fractis membris observatur Gangræna, ac Sphacelus. *Hildanus* subinde in immoderatum usum remediorum adstringentium, (quæ Practicis malè defensiva audiuntur,) Sphaceli causam reiiciendam esse censet. Aliquando & gangræna contingit ab immoderatâ, & inconsultè temereque tentatâ Inflammationum refrigeratione. In contusionibus denique non infrequenter Sphacelo partes affici, *Observationes* abundè testantur.

X. Signa diagnostica quod attinet, Gangrænæ ex Inflammatione inditium est, cum color ab initio flavus apparet, mox malò ingravescente cum immanissimis doloribus, & cruciatibus, abit in fuscum, ac livescentem colorem; Et simul exoriuntur pustulæ grandiores, ichore loturæ carniū simili refertæ: Si dolor remittit, & sensus tactus manet, tunc Gangræna

græna remittit. Si autem dolor cum sensu tactûs recedit, pars-
que nigra, & frigida, ad tactum redditur, Sphacelum omninò
concipit, & totalem Necrosim, inprimis dum tumor, qui an-
tea extensus est, nunc collabascere incipit, & digito pressus,
foveam instar Oedematis relinquit. Gangrænæ verò à frigo-
re signa erunt, dolor pungens, qui tamen brevi mitescit, si quo-
que pars livida, & locus evadat instar, glaciei frigidissimus. Si
ab Hydrope, dolores ab initio sunt mediocres, si verò pars ad
mortificationem tendit, dolores ingravescent, pulsus fit minor,
parsque livescere incipit. Si à constrictione, ligaturâ fortiori,
affectus hic exortus fuerit, ex duritie partis, tumore, dolori-
bus intensis, ex Inflammatione, vesiculis aquâ repletis, & ni-
grore, seu livore partis cognoscitur, membrum fit grave, cutis
ab ipsa carne discedit. Iam ex morfu venenatorum, punctu-
râ, &c. ortas Gangrænas, iisdem ferè signis, quibus ab In-
flammatione natas, cognoveris, quas insequuntur Febres mali-
gnæ, cum deliquiis animi, Vomitibus, & Deliriis. Gangræ-
nam, in Sphacelum transiisse, partemque omninò & penitus
emortuam esse, certò scies, si illa liveat, aut nigrescat, tumi-
da, mollis, & cadaverosa appareat, idque sine ullo arteriarum
pulsu, nec dolor adsit, nec sensus ullus, ut etiam citra sensum
doloris, altè scalpellum adigi possit, sine subsequente sangui-
ne: Si pars foetidum, eumque adeò acrem emittit halitum, ut
adstantes vix ferre valeant. Adest Febris continua, sæpè
& maligna, cum suis Symptomatibus. Quæ accidentia plera-
que, si non omnia, facilè ex succis stagnantibus, horumque
particulis, à materiâ subtili rapido motu percurrente, validiùs
agitatis, rotatis, hincque in fibras allidentibus, easque roden-
tibus, &c. explicari possunt.

XI. Recensitis diri Affectûs, causis & signis, *Prognosis*
subnectamus. Cùm autem tanta atrocitas & malignitas hujus
mali sit, ut, nisi ocysimè suppetiæ ferantur, pars interitura,
imò mortificationis suæ contagio vicinas partes infectura sit,
insuper Chirurgus nonnunquam, desperato jam penitus malo
ad vocetur, institutâ exquisitâ Prognosi, Medicus studiosè pro-
spiciat, ne incautè se suamque artem prostituat. Gangrænam
ex quacunque causâ profectam, gravem morbum esse, nemo
est

est qui ignorat. Sunt tamen distincti gradus, quibus aliæ mitiores & curatu faciles, aliæ perniciosiores, aliæ tandem incurabiles existunt. *Celsus* enim ait, *Gangrænam, si nondum planè obsideat, partemq; teneat, sed adhuc incipiat, curatu non difficillimam esse, præcipuè in corpore juvenili.* Dicimus ergò, recentem Gangrænam, & superficiariam corruptionem in cute & carne, haud tamen insigniter nervos, venas, tendines, &c. occupantem, medelam suscipere, atque curari posse, minimè verò secùs se habentem, & in Sphacelum valdoperè degenerantem. Gangræna, occupans internas & nobiliores partes, præsertim cerebrum, hepar, lienem, mesenterium, intestina, &c. lethalis semper est; Externarum verò Gangræna curationem meliùs admittit. Sic & Hydropicorum tibiis, & scroto, quæ supervenit Gangræna, difficilis curatu est. A causis externis, quæ provenit, contusione, ustione, fracturis, vulneribus, &c. sanabilior, & minùs periculosa habetur eà, quæ ab internis profiscitur causis, sanguinem coagulantibus. Si Gangræna non statim occurratur, transit in Sphacelum, succi enim continuò magis magisque coagulantur, & sic mortificatio fit. Sphacelus perfectionem adeptus, nisi ferro & igne tollatur, immedicabilis existit, serpit enim promptè, vicinasque partes invadit, & hominem ipsum citò jugulat; quamobrem secundùm *Ovidii* dictum, quidquid corruptum, est

Ense recidendum, ne pars sincera trahatur.

Sphacelus enim, seu emortuum membrum, nisi à sanis partibus tempestivè præcidatur & amputetur, primùm proximas partes, dein alacriter procedendo, majora vasa, nervosque insigniores mortificat, sicque subinde intra 24. horas, Necrosis, à partibus minoribus communicatur majoribus, venenumque hoc corrosivum integram subit liquorum circulantium massam, ut eorum motus vitalis promptè cessans, hominem neci tradat. Ad salutem hinc terminatur Sphacelus incipiens, si suppetiis à medicamentis generosis allatis, omnia tolerabilia apparent, circulatio humorum restituitur, gravioraque symptomata remittunt & evanescent. Ad mortem verò tendit, si neque generosissimis medicamentis quid efficitur, sed symptomata ingravescent, pars nigrescit, & cadaverosum spargit

fœtorem, sudor frigidus à toto promanat corpore, & jactationibus, deliriis, singultu æger defatigatur; vel Syncope sublequitur, tunc enim cum horrore & tremore, mors horrida cito pede insequitur.

XII. Gangrænæ curandæ Indicationes, ab affectûs varietate, sunt petendæ, nam pro ejus magnitudine, & essentiâ diversâ variè instituitur curatio. Primaria tamen indicatio est, ut ante omnia obstructio tollatur, & succis stagnantibus liberior concedatur transitus & motus progressivus; id præstamus tam internis quàm externis, in quem finem varia exhiberi solent Diaphoretica, absorbentia, balsamica, oleosa, spirituosâ, salia volatilia quæcunque &c. Hinc profunt omnia antifebrilia, inprimis antimoniatâ, cum Diâscord. Fracastor. camphorâ, omnia theriacal. &c. Externè applicantur Fomenta spirituosâ, tubulos, fibrasque relaxantia, simul & calore suo viscidum attenuantia.

XIII. In Gangræna ab Inflammatione, & ab applicatis remediis contrariis, frigidis ac repellentibus, eò respiciendum est, ut prius ista abjiciantur: dein pars gangrænosa examinanda probè; in qua sæpè succi coagulati, & stagnantes, sale suo volatili destituti sunt, qui quâ datâ portâ avolant, sanguis cum reliquis succis non ampliùs circulantibus, stagnat, perversèque mixtus est; Salia acida ac corrosiva, cùm ad partem læsam sibi imperium rapiunt, canaliculos ferè omnes dirumpunt, & sic fores effringunt, reliquis obstructis relictis: ad quos aperiendos & succos corruptos, stagnantesque fluidiores volatilioresque reddendos, sudorifera ex superiùs dictis, Diâscord. Theriac. spir. C.C. vol. ocul. cancri, antim. diaphor. parata, aliæque acidum, inprimis temperantia remedia conducunt. proin seqq. mixtura cochleatim exhibeatur.

℞. Aq. card. bened. meliss. ā. ʒjβ.

theriac. camphor. ʒβ.

Syrup. rub. id. ʒvj.

Spir. C.C. vol. ʒβ.

Antim. diaph. ocul. ☉ ppt. ā. ʒj. M. ad V.

Externè verò statim applicari poterit calidè spir. vini theriacal. vel camphoratus, Sequens fomentum non inutile erit

℞. Rad.

℞. Rad. Aristol. utriusque. Valerian. Scorzon. Imperat.
an. ʒβ.

Herb. scord. rut. rec. absinth. major. organ.

Flor. calend. samb. chamom. an. Mβ.

Bacc. laur. junip. an. ʒiiij.

Myrrh. el. ʒjβ. camph. ʒj.

Incisa & contusa, coq. in vin. alb. vet. sufficienti quantitate, in vase duplici. coctura linteis calidis excepta, insuper spir. vini camphor. vel Rore minerali conspergatur, & calidè applicetur.

In malo contumaciori, spirituosas, ut sunt Elix. vit. Tinct. castor. &c. cum camph. majori quantitate usurpanda sunt; in primis spir. salis ammon. in vitro benè clauso lentè calefactus, calidè applicetur, & Fetus iterum imponatur calidè, omniq̃ue bihorio vel citiùs repetatur. Aqu. calc. viv. vel per se, vel cum spir. vin. camphor. mixta, in Gangræna ac incipiente Sphacelo egregium est remedium. Urina humana, stercus vaccini. vel caballini. ob sal volatile quod possident, in rusticis aliisque plebeis summum est remedium.

XIV. Si Gangræna producitur, uti diximus, ab externo frigore, à quo succi nostri quasi congelati sunt, & in coagulum abeunt, & quidem à defectu materiæ subtilis, illos perfluentis, cum nempe in aëre non sufficiens motus materiæ subtilis adfuerit ad humores fluidiores servandos; tùm membra refrigerata non statim igni admovenda sunt, ad congelationem tollendam, & calorem inducendum: sed priùs nive fricentur, vel aquæ primùm frigidæ, & post aliqualem moram, paulatim tepidiori redditæ, immittantur, succi enim congelati sensim ac sensim ita resolvuntur, & ad pristinam mixturam pristinumq̃ue motum tam intestinum quàm circularem reducuntur & rediguntur; postmodum succi jam aliquatenus attenuati & resoluti, calore fortiori sunt dissolvendi, in quem finem conducet sequens vel simile balneum, aut ex iisdem ingredientibus paratus fons.

℞. Rad. angel. galang. an. ʒβ.

rapar. bryon. an. ʒjβ.

H. Rut. scord. rorism. absinth. nicot. an. Mjβ.

Sem. cum. urt. an. ʒij.

Sal. ammon. fal. tartari an. ʒβ.

Coq. in parte una vin. opt. & 2bus part. urinæ; hinc membrum congelatum calidè immittatur, & dein fricetur sequenti, vel simili mixturâ,

℞. Spir. vin. camphor. ʒij. Spir. cochl. ʒβ.

Ol. guaj. junip. terebinth. philosophor. an. ʒj. M.

Si verò pars tendat ad Sphacelum, imponatur suprà dictus fottus, & procedi potest eodem modo ac superius recensuimus. In hoc casu præter externa, etiam interna usurpanda sunt, præsertim sudorif. quæ omnem implent paginam.

XV. Si Gangræna ab Hydrope fuerit producta, cum partes diu à succis stagnantibus & evasatis fuerint distentæ, hinc omnis partium textura perdita ac disrupta, à corrosivis istis humoribus, qui instar lupi esurgentis omnia corrodunt, devorantque; curatio est instituenda, quæ non multum differat à priori jam dicta, & sæpè magno cum effectu sequenti remedio usi sumus

℞. Aq. calc. viv. ℥ij. Spir. vin. camph. ℥β.

Elix. vit. ʒj. M. Applicetur calidè cum linteis dupl. Sequens non erit usus contemnendi:

℞. Rad. Angel. aristol. rot. an. ʒj.

H. scord. rut. salv. major. an. Mij. cochlear. Mij.

Sem. card. bened. eruc. ana ʒβ.

Bacc. junip. laur. an. ʒj.

Coq. in urin. & lixiv. suffic. quant. & quater de die foveatur pars, linteis hoc decocto calido madidis.

XVII. Gangræna à scorbutico sale excitata, ut plurimum Infantes infestat, quorum dentes sæpè omnes excidunt, gingivæ foetent, os maxillæ corruptum corrosivumque conspicitur, facies adest pallida, nonnunquam œdematosa. Ut ergò ocyssimè huic affectui occurratur, necesse est, hinc eluentur partes infectæ cum spir. vin. camphor. Balf. nerv. permixto. Vel quod fortius est, aqua calc. viv. cum aq. phagedæn. permiscetur, dum flavescit, addito, si lubet, tantillo spir. vin. camph. & pars cal. frequenter foveatur: hâc tamen aquâ gingivæ non sunt eluendæ, ut, quæ aliis antiscorbuticis oris colutio-

lutionibus indigent; quemadmodum aliàs hoc in malo semper antiscorbutica admiscenda sunt, v.gr. spir. cochlear. trifol. fibr. nasturt. beccabung. &c. Internè conducunt varia antiscorbut. inprimis sequens :

℞. Elix. vit. ʒij. Spir. trifol. fibr. cochl. an. ʒj.

M. de quo assumi possunt, X. XV. ad XX. gutt.

Hujus remedii ope, mucus acidus in primis latens viis, attenuatur temperaturque, ac ipse sanguis, reliquique succi edulcorantur. Decoct. lignor. adjectis Herbis aromat. cochlear. becabung. trifol. fibrin. rorismar. bacc. junip. &c. interponi potest.

XVII. Quodsi Gangræna fuerit à morfu venenatorum animalium, tunc in primis conveniunt sudorifera, qualia sunt Theriacal. Diascord. Bezoardica, aliaque, quæ in Febribus malignis usualia sunt, omnia enim ea & hîc juvamen præstant. Externè scarificatio & quidem cum cultellis, profundè adactis prodest, cum sanguinis proba extrusione. Deinde parti affectæ superiùs annotatus fots applicetur. Hîc etiam proderit Theriac. vel Diascord. in spir. camph. vel theriac. dissolutum, & tepidè applicatum, ut & aq. calc. viv. &c.

XVIII. Si Gangræna natales suos accepit à combustione, aut à contusione vehementiori, cura non differt ab alia; uti & illa, quæ fit à forti ligatura, quam Chirurgus non uno statim actu perfectè, sed sensim ac sensim solvat & laxet, ne uno impetu sanguis & succi ruant in partem affectam, & ipsam nimis extendant; dein Fots aromat. & reliqua spirituosæ sæpiùs jam dicta imponantur. Emplastra hîc, ut in aliis Gangrænæ speciebus haud conveniunt, quia poros magis obstruunt, sicque malum adaugent; sed medicamenta calida semper imponi debent.

XIX. De scarificatione partis Gangrænosæ, ac Sphacelatæ, hodie inter Medicos controvertitur; ob sanguinem attrahendum Veteres plurimi institutam voluerunt: sed Neoterici quidam eandem administrari cupiunt ea propter, quod ejus ope sanguinis motus, & vigor in partibus restituatur. *Botall. de vulnerib. scloper.* hîc remedio se plures liberâsse asserit, & nullum aliud præstantius, atque tutius, si in tempore usurpetur, inveniri addit. Sed *Celeberr. Overkamp*, aliique huic contradicunt, qui

partem jam sufficienter scarificatam esse inquiunt per minutissimos cultellos intus latentes, per quos textura partium laceratur. Præterea dicunt, quòd viæ, per quas medicamenta penetrare debent, satis apertæ existant, & non opus sit eas majores efficere; hinc magis noxias proclamant scarificationes, utpote vasa lacerantes, discindentes, ex quibus succi evasentur, & coagulentur, sicque magis ad putredinem ansa detur: Ad-
dunt, quòd aër externus, sanguinem magis corrumpat, & coagulet, quia ipsum jam apertè aggrediatur, quod non posset efficere, si sanguis vasis suis integris reclusus permaneret; contrà *Celeberr. Broen, de dupl. bile Veterum*, his respondet dicendo: Verum me herclè alia planè ratio est, inter scissionem illam internam, ab acidis particulis, & externam, per cultellum incisori-
um; Illa enim malum auget; hæc verò mitigat, non quidem per se, sed per consequens. Primò enim sanguis sanus, & floridus, in partem affectam effluens, quatenus per poros suos transmittit materiam subtilem valdè peregrinam ab illa, quæ poros partis gangrænosæ l. sphacelosæ perfluit, fermentum illud acidum ibidem hærens, commodè valet infringere. Nec est, ait, quòd quispiam aëris accessionem metuat, in scarificatione, quia tempus non tam diuturnum requiritur, ut noxii aliquid ab aëre possit adferri, inprimis cùm interea ad usum revocetur egregium Lavamentum, Sale oleoso-volatili turgidum. Nos verò ut dicamus, quid de scarificatione sentiamus, credimus firmiter eam non modò non noxiam, sed aliquando etiam utilem esse, cùm remedia topica hinc eò melius in vasa & tubulos penetrent, succos in iisdem coagulatos resolvant; Et, quod præcipuum est, sanguis per vascula incisa, melius ad partem influere, & etiam inde effluendo, corrosivas simul particulas, secum rapere potest.

XX. Quòd attinet curam Sphaceli, eò tantum adniten-
dum est, ut pars corrupta & emortua benè à sana separetur, ne pars sana simul labem adquirat. Si ergò Gangræna à neglectis optimis remediis, migraverit in Sphacelum, isque planè perfectus fuerit, majori vi procedendum, & quia, quamcunque etiam partem invaserit, brevi hominem trucidat, ultimum remedium ad manus est sumendum, parsque emortua citò, tutò
tamen

tamen refecanda, aut urenda. Optandum equidem foret, operationem talem nunquam in usum trahi debere; sed tamen consultius esse existimamus cum *Celso*, anceps remedium quàm nullum experiri. Unicum enim servandi corporis remedium restat, membrum videlicet emortuum, & corruptum à sano rescindere, vel candente etiam ferro extirpare. Crudelem siquidem Medicum necessitas facit, nam crudele malum, crudeli remedio expugnandum; satiùs est, partem aliquam perire, quàm totum hominem: Nec illa dura videtur curatio, cujus effectus salutaris est. Quamvis verò Auctores circa modos amputationis inter se valdè discrepent, commodissimus tamen modus nobis videtur sequens; scilicet antequam incisio fiat, implorato Divino auxilio, patiens volatilibus & spirituosus est roborandus; & omnia, quæ ad hoc opus requiruntur, instrumenta, & alia necessaria in promptu sint, ut citò hæc operatio peragi possit. Dein detineatur vel imponatur patiens in scamnum conveniens; Chirurgus si ex. gr. pedem sphacelatum altiori scamno firmiter fasciis alligaverit, trahat cutem, musculos & carnem sursum versùs sanas partes, ut scilicet operatione peractâ, ossi denudato iterum obduci possint, sicque vinculo validò arctissimè constringat, partim ad doloris immutationem, partim ad Hæmorrhagiam nimiam inhibendam. Factâ hâc ligaturâ, in sana parte 3. digitos latâ, (quem modum ego, cum *Hildano* & aliis longè præfero) carnem, usque ad os, scalpello aliquantulum falcato, circumcirca dividat, ita ut periostrum quoque undique pertundatur, quod postmodum eo in loco, cui ferra admoveri debet, abradendum; hinc ferram huic rei aptatam ossi Chirurgus imponat, sicque illud citò, tutò, agilique cum dexteritate detruncet. Factâ sectione, sunt, qui cauterium actuale, remedium non semper contemnendum, admovent: Alii autem hanc adustionem damnant, & tantùm imponunt stuppam camabinam, albumine ovorum madefactam, & pulv. stypt. inspersam; vel solo liquore styptico imbutum linteam imponunt, & vesicâ bubulâ obtegunt. Quò factò membrum deligetur, sicque deligatum, per duos tresve dies detineatur. Postea autem, ablatis ligaturis, opera datur, ut eschara decidat, quâ separatâ, vel filo vulneris os latis futuris

futuris constringendum, vel per Emplastra cutis attrahenda; Ulcus debitis digestivis mundificandum, pulveribus absorbentibus, & glutinantibus siccandum, ac sic fasciis diligenter involvendum, ne aër conglutinationem impediat, & corruptionem ac nigredinem ossi inducat. Atque sic pergendum est ad usque plenariam ab ægro recuperatam sanitatem.

XXI. Quantum ad Diætam, illa sic instituenda, ne illius finiter usus morbi causam gignat, & vim medicamentorum impediat. Aër itaque sit purus, temperatus, serenus, non autem fuliginosus, nebulosus, frigidus, aut aliis inquinamentis infectus, si autem talis, corrigendus erit suffumigiis ex fantal. citr. lign. junip. aliisque aromatic. institutis. Eligantur cibi boni succi, facilisque digestionis, facileque in succum laudabilem & sanguinem abeuntes; commendantur ova, aviculæ, juscula caponum, gallin. &c. Vitentur contrà omnia acida, austera, falsa ac saccharata, sanguinem & succos nostros facile coagulantia, corrumpentia, & stagnationem obstructionemque producentia, quæ hîc, ceu Pestis fugienda sunt. Potus sit vel cerevisia benè cocta, ac Herbis aromat. appropriatis correctâ, vel vinum dulce, vel aliud minùs acidum. Potus omnis frigidus fugiatur. Motus & quies, somnus & vigiliæ, ut sibi invicem respondeant, summo studio annitendum, alternâ enim requie quod caret, durabile non est. Animi pathemata sunt freno rationis coercenda. Excretorum & retentorum, ut in omnibus, ita & in his affectibus, maxima est habenda ratio. Alvus sit aperta, & si officium suum denegat, suppositoriis, clysteribus, sollicitanda. Menses quoque, Hæmorrhoides, urina, ut legitimè evacuentur, omni studio prospiciendum.

F I N I S.

